

Evangelii ho tsoa Patamose



SABATHA MANTSIBOEA

Bakeng sa thuto ea Beke ena, Bala:

Tšen. 1:1–8; John 14:1–3; Deut. 29:29; John 14:29; Ba-Rom. 1:7; Ba-Fil. 3:20; Dan. 7:13, 14.

Temana ea Khopolo:

“Ho lehlohonolo ea baling, le ba utloang litaba tsa boporofeta bona, ba bolokang tse ngoliloeng teng; hobane nako ea tsona e se e laufi” (Tšenolo 1:3).

Boporofeta ba Tšenolo bo ile ba senoloa ka pono ho moapostola Johanne lilemo tse ka bang makholo a leshome lemetso e robong tse fetileng nakong ea khoholeho ea hae sehleke-hlekeng se se nyenyane se mafika se tsejoang ka hore ke Patamose (Tšenolo 1:9). Tšenolo 1:3 e supa hore buka e ne e lokela ho baloa haholo ka kerekeng. Temana e tšepisa lehlohonolo ho motho ea balang haholo, 'me hape le ea balang. Bamameli ke phutheho e phuthehetseng kerekeng ho utloa melaetsa. Leha hole joalo, ba lehlohonolo e seng habane feela ba bala kapa ba mamela, empa hobane feela ba utloa mantsoe a buka (sheba Tšen. 22:7).

Boporofeta ba Tšenolo ke ponahatso ea tsotello ea Molimo ho sechaba sa hae. Bo re supisa bokhutšoanyane le bohlokolosi ba bophelo bona, pholohong e ho Jesu, le pitso ea rōna khasong ea Evangelii.

Boporofeta ba Bible bo joalo ka lebone le bonesitseng lefifing (2 Pet. 1:19). Bo retetsoe ho fana ka tataiso bakeng sa maphelo a rōna kajeno le tšepo ea bokamoso ba rōna. Re tla hloka tataiso ena ea boporofeta ho fihlela ho tleng ha Kreste le ho thehoeng ha 'muso oa Molimo o sa feleng.

**Ihute thuto ea beke ene ho lokisetsa Sabatha, 5 Pherekhong.*

Sehlooho sa Buka

Bala Tšenolo 1:1, 2. Bohlokoa ba sehlooho sa buka kaofela ke bofe? Sehlooho se re ruta eng ka seo buka hantle e leng ka sona?

Tšenolo 1:1 e bolela sehlooho sa buka e le “Tšenolo ea Jesu Kreste.” Lentsoe tšenolo le tsoa lentsoeng la se-Gerike apokalupsis (apocalypse), le bolelang “ho koaholla” kapa “ho khurumulla.” Apocalypse ke koahollo ea Jesu Kreste; e tsoa ho Jesu e bile e bua ka eena. Leha e tsoa ho Molimo ka Jesu Kreste (sheba Tšen. 22:16), buka e paka hore Jesu hape ke khubu ea likateng tsa eona. Apocalypse ke boitšenolo ba hae sechabeng sa hae eleng sesupo sa tsotello ho bona.

Jesu ke khubu ea Tšenolo. Buka e qala ka eena (Tšen. 1:5–8) le ho qetella ka eena (Tšen. 22:12–16). “Tlohellang Daniele e bue, le tlohelle Tšenolo e bue, ’me li bolele hoo e leng ’nete. Empa hosa tsotellehe hore na ke karolo efe e rutoang, phahamisa Jesu e le khubu ea tšepo eohle, ’motso le lehlomela la ntlo ea Davida, le naleli e khanyang ea meso.”—Ellen G. White, *Testimonies to Ministers and Gospel Workers*, p. 118.

Hape, Jesu oa Apocalypse ke Jesu li-Evangeli tse ’ne. Tšenolo e tsoela pele ho hlalosa Jesu le mosebetsi oa hae lebitsong la sechaba sa hae joalo ka ho bontšitsoe pele li-Evangeling. Buka ea Tšenolo joale e shebane le litlha tse fapakaneng tsa boteng ba hae le bosebeletsi. Hantle-ntle, e qala moo li-Evangeli li qetellang, ka tsoho ea Jesu le nyolohelo ea hae leholimong.

’Moho le epistole e eang ho Ba-Heberu, Tšenolo e tiisa mosebetsi oa Jesu oa leholimong. E bontša hore ka mora nyollelo ea hae, Jesu o ile a tlotsetsoa bosebeletsi ba hae ba borena le boprista tabernakeleng ea leholimo. Ntle le Tšenolo (le Ba-Heberu), tsebo ea rōna ka bosebeletsi ba Kreste leholimong lebitsong la sechaba sa hae e ne e tla ba e fokolang le ho ba sephiri. Le la Ba-Heberu, buka ea Tšenolo e re fa pono e khetheleng bosebeletsing ba Jesu lebitsong la rōna.

Bala Johanne 14:1–3. Ke joang e tšepiso e pharalaletseng moo e re thusang ho utloisisa seo Jesu a se etsang bakeng sa rōna leholimong ha joale? Ke joang re ka ithutang ho fumana tšepo pallong ee e hlolang?

Sepheo sa Buka

Tšenolo 1:1 hape e bolele hore sepeho ea buka ke ho bontša liketsahalo tsa ka moso, ho qala nako eo buka ka bo eona e neng e ngoloa. E mong le e mong ea tloelaneng le Tšenolo o tla hlokomela hore liketsahalo tsa ka moso—e ka ba tse seng liphethahetse (bonyane ka pono ea rōna kajeno) kapa tseo e leng hona lit la etsahala (hape ho latela pono ea rōna kajeno)—li nkile karolo e kholo ea likateng tsa buka. Ha halofo ea pele ea buka ea Tšenolo (likhaolo tsa 1–11) li shebane le liketsahalo tse etsahetseng lekholong la pele la lilemo A.D. ho isa nako ea ho qetella, halofo ea bobeli (likhaolo tsa 12–22) li fshebane le liketsahalo tse lebisang ho khutleng la bobeli ha Jesu. Lebaka la mantlha la boporofeta ba Bible ke ho tiisetša hore, ho sa natsoe hore na bokamoso bo re tiisetša eng, Molimo o ntse a le taolong. Tšenolo e etsa sona seo: sa hore e re tiisetša hore Jesu Krete o na le sechaba sa hae nakong eohle ea nalane ea lefatše le liketsahalong tse mpe tsa lona. Hape, boporofeta ba Tšenolo bo na lipheo tse peli tse tšoarehang: ho re ruta hore na re lokela ho phela joang kajeno le ho re lokisetša bokamoso.

Bala Deuteronoma 29:29. Ke joang temana ee e re thusang ho utloisisa lintho tse ling tseo re sa li senoleloang? Ho latela temana ena, sepheo ke sefe sa lintho tseo re li senoletsoeng? Ke hore, ke hobaneng ha re li boletsoe? Sheba hape Tšen. 22:7.

Boporofeta ba Tšenolo ha bo ea romeloa ho khotsofatsa lenyora la rōna la bokamoso. Buka e senola lintlha tseo tsa bokamoso tse leng bohlokoa ho rōna ho ka litseba. Li senotsoe ho ka re tiisetša ho tiea ha se tlang ho etsahala e le hore re tle re ele hloko ho hloka Molimo ha rōna, le hore ho mo hlokeng moo, re mo utloe.

Ke lilemo-lemo mabare-bare le likhakanyo tse ngata tsa bohata li se li boletsoe malebana le linako tsa mehla ea ho qetela. Maruo a bokeletsoe ke bao, ka ho porofeta tsa qetello, ba se ba hamme balateli ba bona, ka ho ba tšosa hore ba fane ka chelete bosebeletsing ba bona kahobane, bofelo bo le haufi. Nako eohle leha ho joalo, bofelo ha bo ea ka ba tla, 'me batho ba sala ba nyahame le ho ferekana. Joalo ka lintho tse ngata tseo Molimo a re fileng tsona, boporofeta bo ka senngoa le ho sebelisoa hampe, le bona.

Bala Johanne 14:29. Ke motheo ofe oa bohlokoa oo re ka o fumanang moo malebana le sepheo sa boporofeta?

Puo ea tšoantšetso ea Tšenolo

Bala Tšenolo 13:1, Daniele 7:1–3, le Ezekiele 1:1–14. Ke eng ntho e le 'ngoe eo lipono tsee li nang le eona e tšoanang?

Tšenolo 1:1 e tsoela pele ho bolela hore: “tseo a li rometseng ka lengeloi, a bileng a li tšoantšetsa Johanne, mohlanka oa hae”. Mona lentsoe le bohlokoa haholo bukeng ena. Lentsoe tšoantšetsa ke lentsoe le tolokiloeng la se-Gerike semainō, le bolelang “ho bontša ka matšoa.” Lentsoe lena le sebelisoa Testamenteng ea Khale ea phetolelo ea se-Gerike (Septuagint), moo Daniele a hlaloseletseng morena Nebuchadnezzar seo setšoantšo se sehlohali se entsoeng ka khauta, silefera, koporo, le tšepe, seo Molimo a se botšitseng morena “ ‘se tlang ho etsahala nakong e tlang’ ” (Dan. 2:45). Ka ho sebelisa lentsoe le tšoanang, Johanne o re bolella hore liketsahalo le lipono tsa Tšenolo o li bontšitsoe ponong ka mokhoa oa tšoantšetso. Ka tataiso ea Moea o Halalelang, Johanne ka botšepahi a ngola litaba tseo joalo ka ha a li bontšitsoe liponong (Tšen. 1:2).

Ka hona, puo eo boporofeta ba Tšenolo bo hlalositsoeng ka eona ha ea lokela ho hlalosa joalo ka ha e le joalo. E le mokhoa, leha ho bala Bibe le kakaretso ho ka utloisisa joalo ka ha e ngotsoe ha latela lengolo (ntle le moo lengolo le bontšang moelelo o itseng oa tšoantšetso), ha re bala Tšenolo—ntle le ha temana e bontšitse hore e nkuoe joalo ka ha e le joalo—re lokela ho e toloka ho latela tšoantšetso. Leha lipono le liketsahalo joalo ka ha li boporofetilo e le tsa 'nete, hangata li boletsoe ka puo ea tšoantšetso.

Re ntse re beile kelellong semelo se sehlo sa tšoantšetso sa Tšenolo ho tla re boloka khahlanong le ho sotha molaetsa oa boporofeta. Ho lekeng ho batla ho utloisisa se boleloang ke litšoantšo tse sebelisitsoeng bukeng, re lokela ho ba hlokolosi hore re se peteletse botoloki bo itsoelang khopolong ea botho moelelong oa joale oa litšoantšo tseo. Empa, re lokela ho ea Bibeleng le litšoantšong tse fumanoang maqepheng a eona ele ho utloisisa litšoantšo tse sebelisitsoeng bukeng ea Tšenolo.

Ha e le hantle, ho lekeng ho manolla se boleloang ke litšoantšo tseo ho Tšenolo, re lokela ho hopola hore boholo ba tšona li nkuoe Testamenteng e ncha. Ka ho supa bokamoso ka puo ea tse fetileng, Molimo o ne a batla ho tlisa likellong tsa rōna hore liketso tsa hae tsa pholoho tsa ka moso li tla tšoana hantle le liketso tsa hae tsa pholoho tsa nako e fetileng. Seo a se entseng bakeng sa sechaba sa hae nakong e fetileng, o tla se etsa hape bakeng sa bona le nakong e tlang. Ka ho leka ho manolla litšoantšo le matšoa a Tšenolo, re lokela ho ela hloko Testamente ea Khale.

Bo-Molimo

Tšenolo e qala ka tumeliso e tšoanang le ee fumanoang mangolong a Paulose. Buka qalong e ile ea romeloa e le lengolo likerekeng tse supileng tsa Asia matsatsing a Johanne (sheba Tšen. 1:11). Le ha ho joalo, Tšenolo e ne e sa ngolloa bona feela empa meloko eohle ea Bokreste naleng eohle.

Bala Tšenolo 1:4, 5 le Ba-Roma 1:7. Ke tumeliso e fe e tšoanang e fumanoang ho tsona li le peli, 'me tumeliso e fano a ho mang?

Mangolong bobeli u famana tumeliso ea boapostola: “le ke le neoe mohau le khotso.” Polelo ena e na le tumeliso ea se-Gerike charis (mohau) le tumeliso ea se-Heberu shalom (“khotso,” “ho phela hantle”). Joalo ka ha re tla bona ho tsoa litemaneng tsena, ba fanang ka mohau le khotso ke ba bararo ba etsang bo-Molimo. Joalo ka ha bohola ba buka, ba bararo bana ba etsang bo-Molimo ba bontšoa ka puo ea tšoantšetso.

Molimo ntate o hlalosa e le eena “ea leng teng, ea neng a le teng, ea tla 'ne a be teng” (sheba Tšen. 1:8, Tšen. 4:8). Sena se supa lebitsong le halelang la Yahweh, “KE EO KE LENG EENA” (Exoda 3:14) ho supa boteng ba ka ho sa feleng ba Molimo. Moea o Halalelang ho bua ka oona ka mokhoa oa “meea e supileng” (bapisa le Tšen. 4:5 le Tšen. 5:6). Supa ke palo e bontšang phethahalo. “Meea e supileng” e lumellana le likereke tse supileng tseo o sebetsang ka tsona. Papiso ena e supa mosebetsi oa Moea o Halalelang o akaretsang hara sechaba sa Molimo naleng eohle o ba thusang ho phethahatseng pitso ea bona.

Jesu Krete o khetholloa ka maemo a mararo: “paki e tšepehang, letsibolo la tsoho ea bafu, le Morena oa marena a lefatše” (Tšen. 1:5). A supa lefu la hae sefapanong, tsoho ea hae, le puso ea hae leholimong. Joale Johanne o bolela seo Jesu a se entseng: “Ho ea re ratileng, ea re hlatsoitseng libe tsa rōna maling a hae, a ba a re bea marena le baprista ho Molimo, Ntat'ae”(Tšen. 1:5, 6). O “re ratile” ka se-Gerike sa pele e bolela lerato la Krete le tsoellang, le kenyeletsang nako e fetileng, ha joale le ka moso. Eo ea re ratileng o re lokolotse libeng tsa rōna ka mali a hae. Ka se-Gerike, sena se supa ketsahalo e phethahatseng ea nako e fetileng: ha Jesu a ne a shoa sefapanong o ile a re lokolla, balateli ba hae, libeng tsa rōna ka ho sa feleng.

Ba-Efese 2:6 le Ba-Filipi 3:20 li hlalosa ba pholositsoeng e le bao ba tsooang le ho lula le Jesu sebakeng sa leholimo. Seo se ka bolela eng, 'me ke joang ha joale re ka natefeloang ke maemo aa a khabane ho Krete re le “marena le baprista” re ntse re le lefatšeng lee le rohakiloeng? Ke joang 'nete ee e ka susumetsang ka moo re phelang kateng?

Ho ka Sehlohong ho Tšenolo

Qetello ea selekela sa Tšenolo e supa ho seo buka e tsepameng ho sona: ho khutla ha Jesu Krete ka matla le ka khanya. Tšepiso ea Krete ea ho khutla hape e phetoa makhetlo a mararo qetellong ea buka (Tšen. 22:7, 12, 20).

Bala Tšenolo 1:7, 8. Puo ea lengolo lena e nkiloe litemaneng tse 'maloa tsa boporofeta: Daniele 7:13, 14; Zekaria 12:10; Mattheu 24:30. Litemana tsee li re bolella eng ka bonnete ba ho khutla labobeli?

Ho Tšenolo, ho khutla labobeli ha Krete ke ntlha ea ho qetela eo nalane e isang ho eona. Ho khutla labobeli ho tla tšoaea qetello ea nalane ea lefatše lena, le qaleho ea 'muso oa Molimo oa ka ho sa feleng, le tokoloho bobeng bohle, litsikitlano tsa meno, bohloko le lefu.

Joalo ka boholo ba Testamente e Ncha, Tšenolo 1:7 e supa ho khutleng ho hlakileng ha Krete ka borena le khanya. Sebopuo a se seng le se seng, ho kenyeletsa le “ba mohlabileng”, batla bona ho tla ha hae. Mantsoe ana a supa tsohong e khethehileng ea batho ba itseng nakoana feela pejana ho ho khutla ha Krete, e kenyeletsang bao ba mo thakhisitseng. Leha Jesu ka ho khutla ha hae, a tla tlisa topollo ho ba mo lebeletseng, O tlo tlisa kahloho ho bao ba ileng ba nena mohau oa hae le lerato.

Ho tiiea ha ho khutla ha Krete ho tiisoa ka mantsoe ana “E, Amen”(Tšen. 1:7). Lentsoe, e, ke lentsoe la se-Gerike nai, le amenis la se-Heberu le tiisang. Mantsoe ana a mabeli, 'moho a bontša ho tiea ha taba. Tiiso ena ea taba hape e qetella buka (sheba hape Tšen. 22:20).

“Tumelo ho khutleng ho haufi ha Mor’a motho ka maru a leholimo e ke ke ea etsa hore mokreste oa 'nete a be motho ea sa tsotelleng ea bohlasoa ka litaba tsa bophelo bona. . . 'nete ab bona, botšepahi ba bona, le ho tšepaha ha bona li lekoa ka lintho tse fetang tse na tsa lefatše.”—Ellen G. White, *Testimonies for the Church*, vol. 4, p. 309.

Tšepiso e fanoeng e matla joalo ka motho ea faneng ka eona le bokhoni ba hae ba ho e phethahatsa. Ke joang taba ea hore tšepiso ea ho khutla labobeli e fanoeng ke Molimo, eo nakong e fetileng a bolokileng litšepiso tsohle tsa hae, e u fang tiisetso ea hore Krete o tla khutla joalo ka ha a tšepisitse?

Khopolo e Eketsehileng:

Bala Ellen G. White, “Boithuto ba buka tsa Daniele le Tšenolo,” pp. 112–119, in *Testimonies to Ministers and Gospel Workers*. “Tšenolo e ile ea fanoa e le tataiso le matšeliso a kereke nakong eohle ea Bokreste. . . . tšenolo ke ntho e senotsoeng. Morena ka sebele o senoletse ho mohlanka oa hae liphiri tse teng bukeng ena, ’me o rerile hore li buleloe boithuto ba bohle. Linnete tsa teng li lebisitsoe ho ba phelang matsatsing a ho qetella a nalane ea lefatše, ’moho le bao ba phetseng matsatsing a Johanne. Tse ling tsa liketsahalo tse bontšitsoeng boporofeteng bona li se li fetile, tse ling li ntse li phethala ha joale; tse ling li tlisa ponong ea rōna ho koaloa ha khohlano e kholo e lipakeng tsa matla a lefifi le khosana ea leholimo, ’me tse ling li senola tlhlo le thabo ea ba lopolotsoeng lefatšeng le lecha. “Ha ho se be le ea mong ea nahanang hore, ka ha ba sitoa ho hlalosa se boleloang ke letšoao ka leng bukeng ea Tšenolo, ha ho na molemo oa ho batla bukeng ena ea Tšenolo molemong oa ho batla se boleloang ke linnete tse fumanoang teng. Eena Eo Ea senotseng liphiri tsee ho Johanne, o tla fana ho ea batlang ka tiieo ’nete, tatso ea leholimo. Bao lipelo tsa bona li buleileng ho amohela ’nete ba tla thusoa ho utloisisa linnete tsa eona, ’me ba tla fuoa lehlohonolo le tšepisitsoeng ba utloang mantsoe a boporofeta bona, le ho boloka tse ngoliloeng teng.” — Ellen G. White, *The Acts of the Apostles*, pp. 583–585.

Lipotso tsa Puisano:

1. Haeba Tšenolo ke koahollo ea Jesu Krestre, hobaneng lentsoe apocalypse le na le moelelo o seng motle kajeno? See se re bolella eng ka khopolo ea batho ka Tšenolo hara Bakreste? Hobaneng lentsoe tšabo le amahanngoa le boporofeta ba Tšenolo?
2. Nahana ka boporofeta bo bong bo hlolehileng ba batho ba bang boo ba bo entseng lilemong tse 20 tse fetileng malebana le nako ea bofelo le ho khgutla ha Jesu. Ho sa natsoe lipelo kapa khopolo ea batho bao ba bo entseng (tseo re ke keng ra li tseba leha hole joalo), litholoana tse seng monate ke life tsa boporofeta boo bo sa phethahalang? Bo entse hore bao ba neng ba lumetse boporofeta bo ba ikutloe joang? Bo etsa hore Bakreste ka kakaretso ba hlahe joang ho bao ba kantle ba bonang bo boporofeta boo bo sa phethahalang? Ke joang rōna, re le batho ba lumelang boporofeteng ba shebileng liketsahalo tsa mehla ea bofelo e le masupa tsela, re bang le sebaka se tsitsitseng ho utloisisa boporofeta le ka moo re bo rutang ba bang?